

À l'après d'one faflote

*On rît tofêr di mi quand dj' prétind qu'en walon,
Contraîremint au francès, on n' prind nin boû po vatche.
I-gn-a one masse di djins qu'avin.n' crwèyu po d' bon
Qu'on-z-aveut suprimé lès radârs èt lès « flash ».*

*On l'aveut dit au posse èt à l' tèlevision :
« Plus de flash et radars ce mardi sur nos routes ! »
Mins il avin.n' compris : » Ç' côp ci, gn-aurè pupont !
Por on côp nos-alans p'lu mwinrner come po s' foute ! »*

*En francès, " plus " vout dîre : " dipus " ou bin " pupont " :
Ça dépend, po c'mincî, di ç' qu' on vôleut bin dîre ;
Tint qu'à vos d'èspliquer qu'on-z-a tortos raïson :
D'on costé, c'èst tant mieûs, mins d' l'ôte, c'èst branmint pîre.*

*Quand on s'a fait dauber, on prind on' avocat !
Mins dji m' dimande comint, on côp d'avant l' tribunâl
Qu'i va p'lu, en francès, disloyî ç' vî nuk là ?
En walon, one faflote, ça s'ètind à l'orâl.*

*Nosse walon èt s' faflote, il arindjenut tot ça !
" Ti vas " ni s' prononce nin come dins : " Mins, vas' ti taîre !
" Mins ti t'è sovêrès, sés', qui ti n' sés fé ça ! "
Li francès, n' saureut dîre s' i vaut mia rîre ou braîre.*

*Èstô dè l' riniyî, dè l' fé passer po rin,
On freut mia dè l' choûter, d'î tofêr prinde ègzimpe ;
I nos-apwate lès preûves, èt ça fait d'dja longtimps
Qu'on s' comprind sins s' brouyî, qu'on s'a lèvé tot timpe !*

*Albert Delvaux
octôbe 2019*